



寶日堂初集卷之二十一目錄



書

誥勅

工部都水清吏司員外郎陸之祺

工部營繕清吏司員外郎張泰階



工部屯田清吏司主事張醇儒

工部虞衡清吏司員外郎陸懷玉

工部屯田清吏司主事徐在中父徐子方

工部營繕清吏司主事趙天賜

工部虞衡司添註員外郎馬明瑞

大理寺左評事王廷泰

吏科給事中章允儒并妻父誥命

吏科給事中薛文周

戶科給事中羅尚忠

禮科給事中熊奮渭

刑科給事中沈惟炳

兵科給事中沈應時

山東道監察御史馬鳴世

陝西道監察御史沈猶龍

浙江道監察御史陸獻明

山西道監察御史錢士貴

廣東道監察御史李玄

浙江道監察御史帥衆

山西道監察御史吳銜

山西道御史樊尚燦

浙江道監察御史劉之待

廣西道監察御史方大任

山西布政使司河東道右布政使兼按察使司

寶山堂初集卷之二十一目錄  
二  
僉事李應魁

山西布政使劉遵憲

分守山東濟南道按察司副使吳暘

貴州按察司副使兼布政使司右叅議邵應

禎

山東按察司永平兵備道僉事張春

廣東布政使司分巡海南道右叅政兼按察

司僉事兼攝學政魏成忠

山東濟寧州知州董則瑜

河南南陽府通判吳紹志

浙江温州府瑞安縣知縣康元穗

山西澤州陽城縣知縣張文運

山西太原府陽曲縣知縣田景新

四川夔州府建始縣知縣劉世寧

直隸徽州府黟縣知縣趙三極

原任湖廣武昌府大冶縣知縣楊方盛

華亭縣知縣郭如闇

武英殿帶俸中書舍人吳之雅

光祿寺大官署署丞李吐華

光祿寺掌醢署署丞陸啓濛

光祿寺大官署署丞李夢弼

東城兵馬指揮使司副指揮周一元

延慶左衛經歷王應譽

追贈遼東歿事經畧表應泰兵部尚書誥

寶日堂初集卷之二十一目錄

寶日堂初集卷之二十一

誥勅

華亭張鶴世調甫著

工部都水清吏司員外郎陸之祺

水衡職事在川澤梁間其于佐漕疏泉脉而濟國  
喉是惟敏而集于事者吾寵光所畀也爾工部都  
水司員外郎陸之祺郁郁藻思恂恂冲度擢英春  
第文譽擅乎雕龍展采冬官政績優于祛蠹一塵  
莫染主爨而不整地之毛百度惟貞庀材而能惜  
國之耗董茲漕務畀以臬司慎啓閉而悉平疏往

來其並濟舳舻飛輓佐習習之檣烏倉廩陳因借  
源源之流水利旣存于濟國功已高于富民是用  
覃恩授爾階爲奉直大夫錫之誥命夫爾以茂年  
而諳泉隄以文才而習轉運其于將作之務料入  
而綜其目慎出而考其成勿濫勿壅以宣以節汝  
平水土予日望焉欽哉

工部營繕清吏司員外郎張泰階

乃者經營朝位修治園陵輦石庀材將作是寄必  
簡清勤之士以克採辦之司拮据是圖寵光宜畀

爾工部營繕清吏司員外郎張泰階韻度端良風  
猷敏邵以子大夫高第筮仕秋官旣分冬部而爾  
以平三尺之心飭材綜務以活萬人之念率作程  
功非惟民自以不寃亦且事集于無情洛汭紀壘  
書之績寢園錫鏹幣之褒採石督苦于輓輪鑿山  
心勞于手畫用民力而兼惜物力鳩大工而必核  
衆工是惟幹國之猷綽有濟時之具茲授爾爲奉  
直大夫錫之誥命於戲古來朝廷興作原非得已  
功不使鬼必在役人顧何以征不殫于應聲何以

寶日堂初集 卷之二十二  
惠普存乎民力調公私而不易審羸縮而良難爾  
司空之一職旣修將經國之遠途可到勉茲功實  
簡畀方隆欽哉

工部屯田清吏司主事張醇儒

乃者園陵之役鳩工庀材將作方興錢貨殫竭必  
廉貞者能清蠹必弘濟者能息民特簡循良宜加  
申錫爾工部屯田清吏司主事張醇儒清操雅度  
朗識沉幾擢自賢科試于巖邑而能廉同茹檠敏  
若運斤花野春融沅水耀桑麻之日槐庭霜靜桃

源清雞犬之聲吏最上聞朝評僉屬惟勸工程事  
之署簡節用愛人之良而能率作檢稽飭材綜務  
資其明斷程工百度惟貞砥厥素心處臙一塵不  
染世濟美而若予工時頒恩而嘉乃績是用授爾  
爲承德郎錫之勅命夫爾父素稱能吏亦治水衡  
爾惟世厥官而象賢故能諧汝職而佐國但期惠  
普存乎民力務令征不憚于應聲簡畀方隆勉茲  
功實欽哉

工部虞衡清吏司員外郎陸懷玉

疇若予山林川澤之政用助宣氣資生阜至于御  
需軍實罔不是給惠普存乎民力征不殫于應聲  
汝作朕虞宜有嘉錫爾工部虞衡清吏司員外郎  
陸懷玉清操雅度朗識英資軒對蜚英冬曹展采  
而能飭材綜務率作檢稽程工百度惟貞絲遇焚  
而輒理處賦一塵不染蠹無穴之可藏至于洛汭  
位成璽書紀績園陵襄吉鏹幣褒勞流子母以爲  
泉陶陰陽而作冶轉異物盡爲用物開利源兼析  
耗原是惟幹國之猷綽有經時之具茲覃恩授爾  
階奉直大夫錫之誥命今天下物力絀矣官中于  
指吏緣爲奸直出不考其成料入不綜其目大征  
大繕節縮良難爲炭爲爐孳生不易以爾介勤佐  
我蕃蓄利民濟國何遠不臻欽哉

工部屯田清吏司主事徐在中父徐子方

朕綜核功實褒表廉勤睠將作之儁聲嘉嚴庭之  
高誼宜申寵錫以酬穀詒爾徐子方乃工部屯田  
清吏司主事徐在中之父性植清和力敦孝友吏  
習爲吏大雅不以儒名丞不負丞小心而成宦業

寶日堂初集卷之二十一  
色不形于喜怒温温集木之恭人行有合乎準繩  
慥慥篤實之君子一官秋冷獨畱芾樹之陰百里  
春生爰啓蘭枝之秀速肖時勤穀于螺蠃亢宗喜  
借種子棣棠毓是鳳毛登于鴻署茲贈爾爲承德  
郎工部屯田清吏司主事服我明綸以光幽壤  
工部營繕清吏司主事趙天賜

國家將作方興錢貨殫竭庀材程用爰藉繕郎必  
廉貞能肅蠹源惟弘幹乃調民力不有循吏疇若  
予工爾工部營繕清吏司主事趙天賜清慎提身

精詳任事當其筦符花縣畱菱棠陰而能回天性  
于父子兄弟之間急民瘼于水旱癘疫之日廉威  
則鋤奸卻耗德化則表節修文朕嘉其節用而愛  
人遂擢以勸工而程事而爾綜務惟謹稽檢必周  
蠹無穴之可藏絲遇棼而輒理至于二陵襄役竹  
頭木屑皆可寬以便民九廟鳩工瓦礫泥沙盡能  
節而裕國綽有濟時之具是惟幹國之楨茲授爾  
爲承德郎錫之勅命於戲物從地出用財能不傷  
財工必役人動衆何以息衆要使官不中于指則

吏不緣爲奸爾旣諳吏事而考土木之成自能肅  
官常而裕助勩之業勉茲功實以副簡求欽哉

工部虞衡司添註員外郎馬明瑞

朕惟異物無好用物無濫損御需而給軍實庀工  
材而修邊備惟虞衡掌故實司綜辦焉清蠹以廉  
核實以勤調民以惠三者而若予工吾所寵畀也  
爾工部虞衡司添註員外郎馬明瑞清操弘幹朗  
識沉機奮跡賢科揚徽教鐸經政能通世務宅心  
不尚虛名三刀著績春覃河北濟西五馬襄勞澤

被東齊南楚廣樹藝而蒸民乃粒訓耕鑿而旱歲  
有秋僉稱循吏之能特簡虞曹之任而爾處膏不  
潤盡瘁忘勞商饒格外而力不疲賦羨額中而事  
已辦凡攻金攻皮務稽實用修塞上之甲兵卽寸  
帛寸絲幾費苦心救域中之凍殍工焉有賴汝作  
朕虞茲仍授爾爲奉直大夫錫之誥命於戲物從  
地出用財能不傷財工必役人動衆何以息衆要  
使事事循名責實便能轉縮爲盈由其念念憂國  
愛民庶幾寓強于富爾尚益修一官行且作我三

事茂茲功實簡畀方隆欽哉

大理寺左評事王廷泰

朕思古者畫冠而治象刑惟明惟廷尉平敬爾由  
獄旣得聽棘之選宜覃錫袞之褒爾大理寺左評  
事王廷泰文章絢采經術精微高第上流青年妙  
選擢自賢良之對作予亭讞之司而爾文學能飾  
爰書引經善決比律哀矜庶獄明清單辭朕欲求  
生而爾簡孚于論報予惟勿宥而爾伏念乎得情  
功疑重而罪疑輕有倫有要前爲律而後爲令勿

畏勿休惠我嘉師稱爲良士茲授爾爲文林郎錫  
之勅命夫稱平乃立準人典獄惟作天牧欲守其  
三尺今天子不窮于好生必填其一成俾四方盡  
歸于風動長我王國時乃之休朕不止以法官待  
爾也欽哉

吏科給事中章允儒并妻父誥命

朕重臺諫之臣必簡廉明之吏蓋以其無欲不阿  
于世路以其能幹克定乎朝紛雖危言而朕必容  
在直節而朕彌重欲鼓敢言之氣宜申直道之褒

爾吏科給事中章允儒性定而能識人倫心平而善持公論礪然不滓屹矣無阿試烹鮮而競絀惟宜擢補袞而諷直有中卓然獨立執天下之公是非穆爾深思計朝廷之大利害據其吐言之敢決髀骨何傷念爾叅慮之沉幾批鱗非過敦茲臣節綽有父風茲以覃恩授爾階爲徵仕郎錫之勅命夫爾父臺臣也能特立以襄皇祖爾諫臣也且昌言以迪朕躬爾惟畧小事而啓沃君心持大體而登進賢士於以竟爾廉能之業用需他日安攘之

猷欽哉

廉吏秉貞必有澹泊之配直臣進讜每資問夜之賢敘爾內功宜加榮錫爾封孺人鍾氏乃吏科給事中章允儒之妻珩璜稟範圍史揚芬捋荼不易華溫秉德終持澹泊養堂愛日時勤啜菽之歡官舍生冰克相懸魚之節問夜交成于雞旦直言靡阻于牛衣室惟有助而國事可營內旣無憂而精忠自竭爾夫飲雲間之勺水萬口懽騰砥朝宁之狂瀾羣邪屏息爾之力也朕用嘉焉是用仍封爾

爲孺人式嘉梧掖之勤彌飭芝函之慶

父

廉以開廉遡清風于吏譜直能繼直稽謹節于朝  
常君得濟美之臣父有重光之子宜隆國典以答  
家麻爾贈階通奉大夫原任雲南左布政使章邦  
翰仁心惠下勁節匡君正經界而平賦潮陽民歌  
慈母蠲濫觴而甦荒江浙人頌海王直言抗卿袞  
而不阿賦無加于廛市勁氣遇中璫而彌銳筭不  
及于牛羊鋤豪齊魯之鄉人謂埋輪有力管轄金  
碧之地翻嗟叱馭無年爾子出爲茂宰所去見思  
入列梧垣其言有中爰念世臣之詒穀特頒晉秩  
之殊褒茲贈爾爲正奉大夫錫之誥命爾子秉直  
不阿以報國也爾其令聞不朽以食報乎

吏科給事中薛文周

興王賞諫盛世旌廉國之讜臣必資介吏其無欲  
可以致主其有守可以繩邪惟遴簡之得人宜寵  
褒之申錫爾吏科給事中薛文周嶽峙孤標冰澄  
素節起邑栽花之宰爲朝勁草之臣而能直道而

行勿欺有犯照人則爲秦鏡賢奸洞悉于胸中醫  
國則以齊扁治亂立分于言下至于列眷陳事殿  
爭虎而仍和抗顏引裾朝鳴鳳而稱瑞原其滿腔  
忠膽祇憑垂橐清風一介不取諸人堯舜君民之  
可樂萬鍾何加于我宮室妻妾之無營王章尚有  
其妻爾且牛衣無婦黔婁未嘗入仕爾仍騎省長  
貧似此孤清宜加覃渥是用改授爾爲徵仕郎錫  
之勅命於戲廉頑起懦伯夷與巢許同清守誠深  
堅汲黯雖責育不過天下知爾爲清白吏朕方倚  
爾爲社稷臣服我新綸益貞末路欽哉

戶科給事中羅尚忠

朕闢門明目爰重司言博選廉能登于禁闥而地  
垣綜國家之經掌天下之計其于主德官方民生  
國課例得繩舉有能其職宜沛殊恩爾戶科給事  
中羅尚忠以子大夫高第入循良吏異等東湖春  
膏比潤德載口碑星渚冰譽同清恩流棠芾遂乃  
簡在青蒲授茲白簡而能正己正人無私無競宅  
心恕而砥行貞風采和而精神肅列眷陳事旣不

效轅下之駒平氣引爭亦何傷殿上之虎言必有  
中朗識運以沉幾犯乃勿欺正直總歸忠厚是惟  
邦直爲朕良臣茲用改授爾爲徵仕郎錫之勅命  
夫讜臣不沽小名而存大體正士不恃勝氣而明  
本心第令諤諤見之局中何須擾擾爭于事外方  
今公如涸澤私無蓋藏西北虜患未寧東南民力  
已竭欲強兵而何緣足食擬富國而疇能裕民爲  
我直言爾惟精計欽哉

禮科給事中熊奮渭

興王賞諫昭德塞違盛世求言達聰明目必正色  
而後能決事必立誠而後能致君是惟良臣宜加  
申錫爾禮科給事中熊奮渭山岳孤高之品珪璋  
特達之資上第蜚英名封報最愛自循良之異等  
擢之瑣闥之上流而爾清能勵物正以繩違急大  
節而不沽小名明本心而不負勝氣抨擊照人爲  
鏡白筆凌霜指陳醫國有方丹心映日氣何傷于  
殿虎天下事非議一家節不折于轅駒社稷憂無  
貽天子惟茲古拾遺之氣節遂爲正朝廷之羽儀

是用改授爾爲徵仕郎錫之勅命夫惟諫官與宰相等言行而道亦行然今天子與正人親人重則言益重爭時事不若格君心攻小人尤宜護君子惟爾在國則爲元氣而予倚爾以勦太平欽哉

刑科給事中沈惟炳

夫有目不以私視故四目明有耳不以私聽故四聰達惟朕聰明之職寄于諫臣其有急大節而不治小名明本心而不務勝氣是予耳目之良也寵章畀焉爾刑科給事中沈惟炳直方自守貞獨不

羣出司三輔名區修明治譜入侍九重近闕總習刑章至于慷慨陳詞公忠致主立是非之界倡正論爲指南當理亂之衝驅讒言于畀北照人爲鏡而熱心之保全者多醫國有方而赤膽之挽回者大蓋凡直諒多揮霍其風采而爾深心獨慎重其轉移爲我良臣實惟國寶是用授爾爲徵仕郎錫之勅命於戲夫今日疆場多事僉曰國無其人議論易紛豈是尊無定主但令臣無比而民無滯不必問河北之盜至如招不來而麾不去自當寢淮

南之謀爾惟一乃心以報予一人直乃躬以對于天下行且安疆定國爲社稷臣寧直不負此耳目寄也欽哉

兵科給事中沈應時

予違汝弼天子是而諫官非有犯弗欺君子依而小人畏惟古拾遺之選須名司諫之臣宜錫褒崇以來忠讜爾兵科給事中沈應時直哉惟清淵乎似道仁孝自根天性急父呼而脫屣一官廉貞雅負生平却人熱而守株四畏是以丹筆散匡廬之

雨露而赤心感楯陛之風雲公忠結主而不孤積于心纔能矢口慷慨陳辭而非激有諸已乃以告君靜綜世局而雅鎮其紛紜獨照時材而默銷其同異和氣無妨殿上之虎直聲不効轅下之駒惟學問先去其偏詖故謀猷盡歸于正直是用授爾爲徵仕郎錫之勅命於戲方今言路弘開勝心競逐事爲國而支節漸遠反莫知國是之所歸見緣人而營壘益堅祇能累人才之俱盡惟平客氣以明本心自能運神膽而襄大計作朕耳目比于股

肱欽哉

山東道監察御史馬鳴世

大器猶規矩準繩後治人而先自治貞臣如青天  
白日出諸口必信諸心用對王麻宜膺國命爾山  
東道監察御史馬明世上第蜚聲名封奏最堯都  
之棠勿翦舜門之日重開選在辟臺聿司風憲而  
爾文明含于靜定強斷濟以清貞丹心揭日月而  
行白華凜風霜其槩殿虎爭而非繇憤激路驄避  
而不屬風稜蓋持大體而協中行故犯勿欺而言  
有中是誠正色立誠之佐不媿直言極諫之司茲  
以覃恩授爾爲文林郎錫之勅命於戲夫今日之  
患羣才雜用則哲惟艱國論多端一尊莫定爾尚  
覈名實以責官方之效提準繩以肅朝廷之權使  
四海蕩平無虞而余一人聲色不動不其休歟欽  
哉

陝西道監察御史沈猶龍

御史補朝廷以光主德疏通便苦以軫民虞察奸  
良而惜人材論當世而持大體有能其職旌以褒

書爾陝西道監察御史沈猶龍鵠起儒林鸚飛軒  
對起邑栽花之宰爲朝勁草之臣而爾能強直不  
違廉公有度補袞矢盟于傾膽回天抗節于批鱗  
人皆懼而已不驚衆方囂而獨自定核材品則照  
人之鏡商理亂則醫國之方夫惟不得已而有言  
名高終非所願是以盡吾心而無諱利害皇恤其  
他予旣陰用爾謀是以顯頒厥寵茲改授爾爲徵  
仕郎錫之勅命於戲夫平心直枉爾將爲國準繩  
解慍回枯爾且爲時風雨惟大器後治人而必先  
自治惟正人務樹德而不專樹威用憲有邦以扶  
元氣欽哉

浙江道監察御史陸獻明

御史檢齊霜憲弘長風猷必清直能肅紀綱必忠  
愿可備耳目惟慈德選宜霈殊恩爾浙江道監察  
御史陸獻明守峻道夷心平氣直勵冰廉于花縣  
播日藹于棠陰平田析簧舌之爭沉幾先物均派  
甦繭絲之苦敷政以寬惟吏民同聲謂之不煩乃  
臺郎缺則選諸所表而爾立朝正色遇事敢言議

紛而靜折其衷衆競而先立乎大爲予蒲軼報爾  
絲綸茲用覃恩仍授爾文林郎錫之誥命於戲難  
清者國蠹易逐者世波秋風擊而寧畏鷹鸇歲寒  
凋而彌高松栢爾惟性不徇物益矢獨念于不欺  
學非近名彌勵孤標于無黨用信君父以和朝廷  
欽哉

山西道監察御史錢士貴

御史圭表百吏糾繩四方惟其直道而行是以不  
仁者遠繫我邦直宜貴寵章爾山西道監察御史  
錢士貴方正褫躬惠和澤物學不欺于暗室潔比  
凝冰才自裕于盤根利同遊刃爰自花封之茂異  
徵爲柱下之惠文而爾直以繩違清能勵物門墻  
峻而壇宇寬風采高而波浪靜無偏無黨正色而  
自具陽秋能吐能茹立誠而不僭風雨有謹言皆  
入吾耳無阿曲盡知乃心是用仍授爾階文林郎  
錫之誥命於戲四海紀綱一人耳目無近名而生  
事惟責實則事事修無駕氣以繩人必推誠而人  
人服在爾在國則爲元氣而予倚爾以致太平欽

哉

廣東道監察御史李玄

朕慎選讜臣睠懷循吏其有守可以執憲其無私  
可以糾邪遴間得人寵渥宜沛爾廣東道監察御  
史李玄水澄素節嶽峙高標製錦譽洽于三河彈  
冠光依乎九陛不依世而獨立惟直已以正人殿  
爭流而忠愛藹然路避驄而風稜儼若有謀必告  
予一人既明目而達聰無比可徇凡百爾皆平心  
而和氣既襄我平康正直之治宜矣爾塞違補闕

之臣茲以覃恩仍授爾階文林郎錫之勅命於戲  
今豺狼充塞中外未寧國是混淆官方雜亂擊其  
醜正爲朕堯羊燭其奸欺作予秦鏡使國家得清  
白吏之用而繫爾有安社稷之功不其庶歟欽哉

浙江道監察御史帥衆

臺察之臣剖奸良以肅朝綱疏便苦而廣主聽其  
持論無依違而陳奏有綱要得是臣者朕甚嘉焉  
爾浙江道監察御史帥衆清德在躬明誠格物邑  
人爭欲以爲父所居愛而所去思舉朝共仰其爲

人合則留而違則去當予求賢之始屬爾極諫之時有中而言爾則寧甘夫賜玦勿欺而犯朕亦何怒乎批鱗葵向日而明主有光軼當堦而佞士無色旣沛終朝之霽日旋挽一騎之清風綽綽乎進退有餘藹藹乎君臣相信是惟殊典宜畀良臣茲以覃恩授爾文林郎錫之勅命於戲寄耳目于一人則不得伺舉朝之顏面作準繩于天下則不得逞一已之威稜爾惟溫爲日而靜爲山自能直如弦而平如水操此攬轡以展澄清之畧不獨折檻而答曠蕩之恩欽哉

山西道監察御史吳牲

御史一人耳目四海紀綱必介勁者臨事而不撓必堅明者在衆而能決故朕用正色之臣以勵分秩之寵爾山西道監察御史吳牲噐資高亮行業茂明文瀾傾廣陵之濤政澤藹閩海之日忽聞呼於父母遂投檄于監司逮水聲再振于濰山爰霜簡聿持于栢府而爾清能勵物正以繩違剛明消擊斷之威勁直著檢繩之實化同異而除荆棘議

論爲之一清調剛柔而振萎蕪紀綱繇是再肅蓋  
惟直已以正人是以畧小而存大允爲蒲軼宜報  
絲綸茲以覃恩仍授爾爲文林郎錫之勅命於戲  
夫文章所以潤身而能文者必事提其體要清節  
所以砥世而善清者每人樂其寬平蓋平心而抒  
赤心則君必格養氣而扶正氣則國必昌朕異日  
需爾作股肱也爾其慎對揚哉

山西道御史樊尚燦

古人稱御史法官也而太和爲氣言官也而至心

爲內夫貞憲而扶元氣直繩而對主休是曰誠臣  
朕嘉寵錫爾山西道御史樊尚燦學文惟博藏器  
則深不食武昌之魚餐水比潔獨畱漢廣之芾愛  
日同溫爰自名封入司臺憲而爾亮直不撓廉公  
有度剛明足資其擊斷清肅咸愛其準繩保聖躬  
圖共濟勿欺而犯定國是于舌端固內地飭邊關  
有中而言置私憂于度外持獨見而先立乎大當  
羣囂而靜綜其衡是惟直言極諫之臣養我蕩平  
正直之福茲以覃恩授爾爲文林郎錫之勅命於

戲惟我祖宗之時綱目皆振法令必行亦惟臺察之官準繩是式化異同則議論清調剛柔則國事濟毋附上而急下毋犯弱而違彊爾今折檻朝端行且攬轡天下勉酬寵眷服我訓詞欽哉

浙江道監察御史劉之待

御史言官也貴謹而忠法官也宜威而肅是惟正直之選必以忠厚爲基故吾慎選清修端重之吏而克之有能其官宜申厥寵爾浙江道監察御史劉之待才通而練器定以疑愛人同春日之溫執

法凜秋霜之肅佐郡憲而司丹筆散雨露于雲閣選辟臺而薦赤忱際風雲于日下靜綜世局而和平雅鎮其紛紜獨照時材而愛惜默銷其同異殿虎爭而盎然和氣路驄避而穆矣清風繇其犯乃勿欺是以言必有中惟爾規矩準繩之大器爲我格心正事之端臣茲用改授爾階爲文林郎錫之勅命夫勝氣易競而難明者本心小名可沽而宜存者大體但無生支節干事外而事事可責其修明第令輸肝膽于言先而言言皆資其共濟用信

寶日堂初集 卷之二十一  
君父以利朝廷予于爾是賴欽哉

廣西道監察御史方大任

御史準繩之官也準正而物取衡繩直而器受則故慎簡正人俾克厥選旣得邦直宜沛寵章以嘉司直爾廣西道監察御史方大任德隅深遠材量醇明製錦技試于畿南佐軍興而甦稜歲操割譽騰乎冀北簡民譽而作國楨爰擢臺端資其獻替而爾靜能鎮躁清以激貪思周天下而不求稱塞于苛纖計叶時宜而不借名高于耳目至于丹心

映日白筆凌霜扶正氣于朝端樹風聲于海內謇謇乎匪躬之節肫肫乎勿欺之誠使予有正直之臣信爾爲清白之吏茲以覃恩授爾爲文林郎錫之勅命於戲時風甚薄國步方艱有一事即生一事之異同誰調旣濟之水火有一人自有一人之本末孰捐不剖之藩籬欲蕩平並効于國家惟忠赤畢輸于君父勉服明命益勵初心欽哉

山西布政使司河東道右布政使兼按察司

僉事李應魁

河以東土沃而民實然惟吏飲水則可鳴絃而治  
事有備而桴鼓寢不驚也察吏除戎于方岳勞臣  
是賴朕錄舊績用勉新功有能其官宜加寵爵爾  
山西布政使司河東道右布政使兼按察司僉事  
李應魁器溫而介才練以沉讀中秘有用之書志  
存經世言內臺可行之事道在致君領朱幡則中  
土春生藩紫塞而西河霜肅功旣高于露布酒泉  
之鎖鑰無虞威已振乎天聲河內之金湯可倚而  
爾救寧操廟筭之勝綏靖出帷籌之餘非特犬羊  
可折箠以笞亦且鴻雁直安枕而臥四郊俗革頌  
畢公之保釐六幕風清褒常袞之觀察茲特授爾  
爲通奉大夫錫之誥命於戲念河內吾股肱郡旣  
富庶則輦轂安而平陽爲帝王都必恬愉乃邊徼  
靜惟是作諸侯型治若孟水之肖方圓總萬幕指  
麾似元氣之轉生殺常調兵食無替恩威欽哉

山西布政使劉遵憲

塞上嚴關雲中重地國險實金湯之府壯猷藉方  
岳之臣旣彰薄伐之功宜受策勲之報爾整飭大

同左衛等處兵備山西承宣布政使司左布政使  
兼按察司副使劉遵憲正能合變廉以生威仁聲  
洋溢乎花封才望羽儀乎粉署領朱幡而膏漸東  
海恩留岱嶽之碑。藩紫塞而威振西河。績紀玉門  
之柱。惟番虜錯揉之地。當蛇豕奔突之衝。來則禦  
之。兵非得已。而爾能戰期必克。伐先定謀。殲虜人  
掌股之餘。得將士爪牙之用。大川長谷。直搗而京  
觀成封。古戍荒城。長驅而靈旗改色。廣居北地。飛  
名已振乎匈奴。尚在雲中。坐鎮更雄于頗牧。爰佩  
符于左轄。用答膚功。仍專臬于右藩。行觀茂績。覃  
恩式扁。懋賞宜崇。茲授爾階。通奉大夫。錫之誥命。  
於戲。養癰護疾。國家事誤在邊臣。盱食宵衣。余一  
人憂惟黠虜。尊中國自有大體。修守而戰。修戰而  
和。制外夷不事虛名。撫窮則勦。勦窮則撫。必封疆  
有備。措內地而衽席其瘡痍。斯鎖鑰無虞。控外夷  
而鞭笞其項背。爾尚殫抒指縱。廣布信威。膺是絲  
綸。光于鍾鼎。欽哉。

分守山東濟南道按察司副使吳賜

朕惟河濟隩區海東重鎮資彈壓者憲吏籍保障者臬臣旣需壯猷宜覃朝錫爾分守山東濟南道按察司副使吳暘宏才偉度介節貞標廉以惠而生威德兼才而濟變棘亭初試噐卓爾而不羣版務載綜操矚然其不滓迨分牧于中土春滿樹棠爰秉憲于浙東風行偃草久孚衆望再畀要區屬岱輿未奠其金湯潢池之警暫息乃濟郡甫離于塗炭中野之羽猶飛惟爾旬宣爲予撫輯旣端形以表吏墨正于繩且順流而令民絃調于瑟解其邪黨藥代病而食救饑戢彼流移雨潤枯而風吹律功高名翰寵渥朝章茲以覃恩授爾爲中憲大夫錫之誥命夫東海邇來多故在位者皆以爲虞至濟河今日救寧處堂者遂忘其慮豈知潰癰而血肉皆我元氣况鋤蔓而蓬蒿亦有勾萌爾惟益懋保釐沛西郊之甘雨予且行加賜履表東海之大風欽哉

貴州按察司副使兼布政使司右叅議邵應禎

朕惟貴筑僻在西南襟帶裔夏苗夷跋扈叛服靡  
常惟清貞者能建威銷萌必靜正者乃安民攘寇  
宜覃寵秩慰我勞臣爾貴州按察司副使兼布政  
使司右叅議邵應禎介性孤標赤誠亮識愛民則  
可捐膚髮潔已則不染絲毫筮仕花封歷更版署  
保民若子而豪強必擊置身于禍福利害之先憂  
國如家而筦鑰時嚴任事得剛柔競練之用既典  
防風之郡彌敷就日之恩守三尺寧逢長吏之嗔  
立片言遂折積年之獄一麾故國夷然靜德如山

二年鬼方漠矣澹情似水副常袞之觀察夜郎六  
幕風清叅畢公之保釐黔巫萬家春盎固圉旣懲  
前而善後馭遠不屈力而屈心俾鷓鴣懷我好音  
而鋤耨徧于殊俗庶幾文武爲憲允矣屏翰惟良  
茲仍授爾爲中憲大夫錫之誥命於戲蠻方之反  
側難安中國之永圖未建尚力贊三苗之敘俾萬  
姓咸慰望于黍離庶遠揚六詔之威予一人豈忘  
功于桑扈用紆宵旰行畀節旄欽哉

山東按察司永平兵備道僉事張春

榆塞嚴關北平重地內奠神京之鼎外扼全遼之衝惟此安攘式資文武宜加崇錫以勵憲屏爾山東按察司永平兵備道僉事張春起自賢科施于有政雉城展采播兩地之春聲鳩署祥刑凜一庭之秋肅噐能任天下之重凝定內具有經綸風則同古人之清澹泊中自饒幹濟特超常格畀以要區惟盧龍當塞上金湯而召虎領渝東屏翰籌邊保塞料虜人于掌股之餘飭武詰戎收將士爲爪牙之用今下而旌旗改色恩敷而蒼赤更生茂績方新覃綸式被茲用授爾爲奉政大夫錫之誥命於戲惟黠奴爲邊塞憂喪玄菟八百里實逃帥誤國家事沒赤子鉅萬人况引夷近地而駐久不歸且致我內疲而慮深叵測爾事關同室患在剥膚安逃民而匈奴之項背可咎濟軍實而危關之鎖鑰乃固常調兵食無替恩威於以襄我輔樞慰予宵旰欽哉

廣東布政使司分巡海南道右叅政兼按察司僉事兼攝學政魏成忠

朕惟粵嶺隩區。天南重鎮。雄价藩而作憲。控蠻海以宣威。惟我幄臣。實堪膚使。宜覃朝寵以勵壯猷。爾廣東布政使司分巡海南道右叅政兼按察司僉事魏成忠。才兼濟德。廉以生威。芾愛日于西江。布陽春于東海。爰自循吏。入爲望郎。除戎噐而核方輿。飭馬乘而修邊事。手畫四征之利害。指麾收虎旅三千。箸籌九塞之情形。抵掌壯榆關百二。惟爾贊七兵而有效。遂屏百粵以分符。而能綏靖荒黎。救寧番澳。兵無遺鏃。馭虺豕直折筭以筭。野不鳴檉。戢鴻雁直安枕而臥。清琴素鶴而雨化瓊山。緩帶輕裘而霜生海島。一方有賴。萬里無虞。茲用覃恩。授爾爲中大夫。錫之誥命。於戲海國多瘡。炎方易動。必其青苗滿黎峒。乃堪致鱷戮于波臣。但今白雉獻越裳。不必揚鱗帆于影國。無忘兵事。綏我遠氓。欽哉。

山東濟寧州知州董則喻

任東海名城也。控國漕之襟喉。當南北之走集。輯衆固圉。非特一方之倚。故吾選良牧以撫之。其有

殊能宜加寵畀爾山東濟寧州知州董則喻讀書能通世務爲政不尚虛名擢自賢科試于巖邑剛百鍊而鋒不挫肱再折而醫愈良膏雨等潤于河流春光長留于淮樹乃升茂宰獨領方州惟此濟西扼于河上以舟楫牽挽之地兼輪蹄供億之衝而爾調劑軍興拊循凋瘵催科乃行撫字利國而兼愛民處那移搜括而百姓晏如絕私派羨餘而一塵不滓若乃由河達濟効灌輸之苦心以至自腹及邊襄飽騰之大計非獨能吏實爲勞臣茲特授爾階爲奉直大夫錫之誥命於戲邇者烽火頻驚潢池載弄豈中士化爲戰地念迷民皆吾蒼生昔渤海令下而枹鼓不鳴馮翊教行而寇偷自解爾爲刺史宜懋乃功朕方勞爾璽書不次加擢汝其祗服朕命益勵宦成欽哉

河南南陽府通判吳紹志

二千石我股肱也而丞倅贊郡符安小民于田里宣教化于四封有能底績朝廷畀旌典以風之况世祿之胄卓有砥樹者乎爾河南南陽府通判吳

寶日堂初集卷之二十一  
紹志以名人哲胤繩武象賢既參幕于西曹乃分  
篆于中土而能廉貞自矢幹濟多方別駕有清風  
官舍情閒如水南陽不可問訟庭氣冷如霜屬城  
借表于方巖端佐資成于畫諾賢聲茂著祖烈克  
光茲授爾爲承德郎錫之誥命夫取材鄧林枝多  
秀也搜玉玄圃璞多奇也爾旣以銀臺之胄起家  
兼以名城之倅著績備棟梁而光席上將竟爾材  
以綏我郡人焉懋哉懋哉

浙江溫州府瑞安縣知縣康元穗

朕勵政方新播德伊始最愛民而重令其有良吏  
人爭欲爲父而嘉績上聞于朝者朕不惜褒賚以  
風天下爾浙江溫州府瑞安縣知縣康元穗通材  
練識雅韻清標擢雋南宮展庸東浙而爾體仁之  
庭訓通天地萬物爲一身佩學道之前聞播禮樂  
絃歌于四境守一介之不苟施不爲而裕如春融  
蔀屋人負日以知暄霜靜庭槐草隨風而悉偃武  
塘方思借寇桐江輒又歌廉薦書口碑達于朝聽  
茲用授爾階文林郎錫之勅命夫爾以發矟之刃

初効操刀出絕塵之足試馳百里而能朞月而可  
萬民見恩充爾志操以勵成績永爲家學之光不  
獨吏治之最朕且下徵書擢爾爲耳目寄欽哉

山西澤州陽城縣知縣張文運

朕嘉意元元思洽于理惟太行之間陽城實稱巖  
邑其民樸嗇而務本然深谷嘯聚撫馭良難樂與  
廉仁共茲保乂爾山西澤州陽城縣知縣張文運  
英標卓識粹蘊通才早雋賢科屢司壯邑而能束  
身砥礪一意撫循日鑿萌心風斤應手登剔樹百

年之畫利器新發于硯清修貽萬室之安矚操獨

茹其檠鞭蒲而行拔薤桴鼓不鳴保赤而濟烹鮮

飛

鴻來

集民安吏習旣已駕熟而馭輕剛吐柔茹無

俟改絃而張瑟朕詢其狀人皆爾賢茲授爾爲文  
林郎錫之勅命夫試割于邑譬猶試馳于坂修途  
肇于初服利民乃以匡君爾益圖製錦之成功我  
則有補袞之顯擢欽哉

山西太原府陽曲縣知縣田景新

朕愛人而重吏亦惟是廉仁之長廣教化美風俗

以興太平之路其有屬在巖邑而吏績奏聞我甚  
嘉焉爾山西太原府陽曲縣知縣田景新長材游  
刃潔操凜水擢自制科試之宰割而能撫摩勤于  
節愛振刷運以精誠除案牘之夙奸風清豪猾需  
閭閻之新澤日起瘵凋至于桴鼓息鳴人皆賣劍  
買犢飛鴻來集寓已飯稻羨魚鬯乃官評達于朝  
聽是用授爾文林郎錫之勅命夫百鍊新試于發  
矧千里初騰其逸足諳民瘼者知國體通政務者  
辨朝經惟爾克廉克仁朕將寄耳寄目勉終令聞  
以副簡求欽哉

四川夔州府建始縣知縣劉世寧

朕軫念民岩諮詢吏事旌賢弘化期在寧人矧茲  
夔府孤城實係錦江下邑地偏民瘠保惠良難宜  
有旌書以褒最績爾四川夔州府建始縣知縣劉  
世寧文能飾治道以愛人桂籍升華花城製錦奏  
割任新安之劇駕輕就蜀道之難而能心存濟物  
政善宜人以鞭蒲行拔薤之威一庭秋肅用保赤  
爲烹鮮之理四野春溫催科政拙而賦自登撫字

寶日堂初集卷之二  
心勞而事不擾恩潤比流乎三峽口碑共載夫二  
天大吏交揚司功獨最茲用授爾爲文林郎錫之  
勅命夫惓惓之吏不急于見奇乃見奇者吏享其  
名而惓惓者民受其賜惟爾兩邑再試三年有成  
崇實不求名朕知之矣慎終如其始爾益茂焉尚  
圖乃功行畀顯擢欽哉

直隸徽州府黟縣知縣趙三極

大江以南多奧邑而黟在新安萬山中其民逐末  
而矜氣必得賢令以噢咻之一教化美風俗比于  
儒秀之區斯亦賢明之効已爾直隸徽州府黟縣  
知縣趙三極令噐珪璋英材于莫賢闡擢雋民社  
展庸而爾敏若運斤廉同茹檠厚四民之業蔀屋  
興謠搜六案之奸豪猾斂跡春融花野人皆負日  
之暄霜靜庭槐化悉隨風而偃薦書列最聲實茂  
聞茲授爾階文林郎錫之勅命夫沃土民逸而董  
其勤瘠土民勞而恤其生黟民貨居則沃而服賈  
則勞梁肉刃芒吐茹在爾永終令譽益厚厥施朕  
於爾且下璽書徵焉欽哉

原任湖廣武昌府大冶縣知縣楊方盛

朕惟山城險錯其風忿勁罕知文律易爲奸欺必  
蕩滌乃克整齊惟梳剔能濟長育睠茲良吏惠我  
疲人爾湖廣武昌府大冶縣知縣楊方盛高第升  
華名封綰綬奏割未盡其用盤根聊試其長而能  
介守一水法懸三尺宛保民而若子凜去蠹其如  
仇驅狐不貸于社憑翦棘彌清乎市猶易謗詈之  
謠而爲歌誦別有轉移借探丸之輩以緝萑蒲益  
徵操縱蓋淬勵雄芒利若太阿之劍而展張弩力  
強于繁弱之弓甘小邑而不羨雄區歷艱途而克  
勤末路以此才兼乎德可占直有其忠是用授爾  
爲文林郎錫之勅命夫如爾治行且徵爲耳目風  
憲之臣矣言路宜敢而中而法吏以威行慈爾愛  
君如惜民則雖直絕而不爲憤激爾執法兼布德  
則雖清肅而不蹈煩苛勉服斯言以需大用欽哉

華亭縣知縣郭如闇

朕愛人而重吏惟東南北縣民力難調嘉與循良  
共圖休養其有修身服官廩廩廉惠聲中其實吾

能尊顯之爾華亭縣知縣郭如閻通才敏識邃抱  
醇衷擢對軒庭譽揚鳳彩分符莆邑澤沛鴻膏六  
年兩依丙舍而漸老其才百里載試雲間而益大  
其用惟爾廉明集事愷悌宜民入境即戶頌保嬰  
蒞官而庭無煬竈念巖邑之賦重寓撫字于催科  
憐瘠土之民彫濟精明以渾厚吏呼不怒民餘新  
穀新絲罔籍常空市無佩牛佩犢政成鸞鳳節比  
羔羊是用授爾爲文林郎錫之勅命於戲夫爾原  
素淡于官不獨已習爲吏無可欲而能爲我肩宏  
鉅有不爲而能爲我鎮囂紛惟吏治貴實不患無  
名而成功厚終宜如鏡始益殫厥心以需大用予  
且以耳目寄汝欽哉

武英殿帶俸中書舍人吳之雅

天近高華雅重揚芬之彥地隣秘密式資載筆之  
英用普明綸以酬清列爾武英殿辦事中書科帶  
俸中書舍人吳之雅高門令噐天路逸材采翰墨  
之芳華紹箕裘之素業而願違風木志阻雲霄迨  
啓秀于軒墀遂依光于日月供奉在丹鉛之外對

揚居筆墨之先萬石之挹損僅守其雌原嘗雖好  
施而不矜爲俠是惟吉人宜頌恩寵茲授爾爲徵  
仕郎錫之勅命夫以爾離奧深而侍螭頭秩清而  
望華也清則毋溺于簡華則毋飾于靡立德立名  
善述善作此乃心慎乃事以昌後福懋哉

光祿寺大官署署丞李吐華

惟辟玉食爰設大官厥有盭梅實司調鼎旣得敏  
慎之選宜覃曠蕩之恩爾光祿寺大官署署丞李  
吐華性資樸茂才識通明造自賢關克茲宰路恣  
慎有敦于四豆清修交勵于五紘饋陳允飭賓筵  
課核不靡廩籩精勤克著恩渥用敷茲以覃恩授  
爾階徵仕郎錫之勅命夫撤膳揚鱠古宰官職也  
若其飭酒漿佐饋祀第曰甘于予口豈朕指哉爾  
其益淬初忱于趨事以光我訓詞

光祿寺掌醢署署丞陸啓濛

朕惟天子玉食之官調盭梅而司鼎鼐誠得儒行  
上流門風骨體者克之是曰俊臣宜加申錫爾光  
祿寺掌醢署署丞陸啓濛識明通風標雋上蘭

庭擢秀呈苞彩于一毛芹水蜚英散筆花于五色  
亦旣廩于周庠豈微榮于湯鼎爰自橋門之彥克  
茲宰路之司而爾清修交勵于五紵必慎有敦于  
四豆飭宴享必謹揚解節冗濫毫無染指不獨甘  
于予口實以克敬爾身茲以覃恩授爾爲徵仕郎  
錫之勅命夫爾祖壯猷已名高于開府爾父直節  
尚用嗇于瑣垣惟爾庖臣爲予近職倘精一心而  
營厥事如調五味而進之君服我明綸光于祖考  
欽哉

光祿寺大官署署丞李夢弼

萬方玉食爰重天庖九鼎調羹分司宰職自非敏  
慎之良不登華近之選宜加申錫用酬士功爾光  
祿寺大官署署丞李夢弼氣度粹和才猷雋爽名  
家子門風克紹高才生文譽茂騰爰自橋門克茲  
宰路勵五紵而脂膩不染謹四豆而饋祀克羞分  
籌力任夫怨勞課實心精于節縮清勤克著恩渥  
用敷茲以覃恩授爾爲徵仕郎錫之勅命夫膳事  
祇嫌予腹而庖額宜惜民膏上宣索而苦濫觴下

浮冒而憂染指爾惟條次故實檢稽名數於以佐  
節愛而享和平乃爲益勵厥職欽哉

東城兵馬指揮使司副指揮周一元

古監門之職戢奸理枉肅清邦畿今之分隸五城  
佐直指巡省者是也有能其職恩章錫焉爾東城  
兵馬指揮使司副指揮周一元以賢父式穀濟難  
兄世美而西序楊芬于藻芹東垣司警于鈴柝片  
言而矜折獄三尺時凜奉公抱鼓不鳴于輦下而  
環衛風清赭衣絕跡于通途而市廛惠洽爲良司  
馬有助行驄是用覃恩授爾階爲文林郎錫之勅  
命夫五方之衆雜治郊圻豪猾依窟而難鋤奸胥  
憑城而爲梗欲安善良須懲奸宄旣潔已操宜察  
吏姦爾惟慎此一命一官行且達于四聰四目朕  
將採使者綜覈以需再命欽哉

延慶左衛經歷王應舉

居庸護神京之背其環衛實當要衝故世其武者  
統之而參以文吏之習于法者夫亦仗其紵良籌  
贊畫諾文柔武奮而邊庭壯焉有能其官宜加褒

賞爾延慶左衛經歷王應譽敬慎程躬勤勞集事  
撫馭三軍鼓舞勾稽百蠹肅清巖約束而諳規繩  
礪操修而顯幹局中于賞律載在課書用授爾階  
爲徵仕郎錫之勅命夫官人若噐立賢無方朕不  
難破資格以敘賢材爾益當勉建樹而圖後効欽  
哉

追贈遼東死事經畧表應泰兵部尚書誥

皇帝制曰雲雷屯塞。光日月者精忠。天地風塵。壯  
河山者正氣。身捐而義不愧。力盡而心已安。崇爵  
宜頒。幽貞是報。爾原任經畧遼東兵部右侍郎兼  
都察院右僉都御史袁應泰。嶽峙風標。淵宏經濟。  
壯志以天下爲任。不避險艱。熱心惟王國。是圖無  
辭盤錯。惟狡奴爲邊塞憂。三十載蓄憤含毒。實重  
臣誤國家事。六七輩護疾養癰。當習欵而盡撤其  
防。卒不能玩之掌上。迨挑釁而莫爲之備。抑且甘

墮其殼中。兵民騷動而忍死偷生。將士彌縫而喜逃。懼戰。議論日煩而墮任事之氣。節制不一而分便宜之權。以此久散之人心。當彼方張之勁虜。而爾擢自節鉞。遂總專征。統玄菟七百里。戎莽之場。提赤手十八萬。枵腹之衆。背城尚收夫三捷。乘障莫禦其九攻。奮臂力起瘡痍。嚼齒誓吞羶羯。至于仰天拜闕。從容陳就歿之詞。閉閣投綬。慷慨伏捐生之義。付熱心于烈焰。委俠骨于荒臺。城亡與亡。吾畢吾事。自古豪傑固難責以成敗。而于今封疆尤宜論其歿生。爰下殉事之旌。特晉中樞之秩。茲加贈爾爲兵部尚書。錫之誥命。於戲。朕于遼敗。重歎才難。叩關航海之徒。何無一人。義士載寶。輦金之輩。豈逃三尺嚴刑。詎知事雖敗而歿殉事尚光在朝廷。况乎賊將亡而厲滅賊。仍功歸社稷。爾靈不昧。服我褒綸。歆哉。

寶日堂先進舊聞序

夫風消影歇境逝人移習見之靡都無可據差有未謝之樸暨乎獨往之神每從性地流寫人間似可恃爲榜樣而溯閱往昔微言特行零落無傳僅僅得之野叟山樵之口相聞以爲佳話此亦鄉井之所悲也吾吳世稱文獻而淞泖之間尤多奇蹟漸靡以往剖變日新君子惧焉吾師侗初先生十年之內蒐討見聞凡諸先輩片言偶動苟足取程無不錄而藏之如聚珠寶者久之積成光采是亦

不朽之盛事矣嗟乎晚俗多歛名場利海沒頂隨  
之孰與先民澹遠朗率直還本性密心妙用聞見  
雙除在庸夫小儒未嘗不迂鈍目之而一往蘊藉  
顧獨常在使千秋而下拾其冷風者猶足滌肺腸  
而開耳目以此較彼意味果孰饒乎世間墨卿久  
成諛種眉前墓下有類鏤空先生此集上自名卿  
鉅公下迄布衣裙婦尋幽剔渺正使寂寞之餘忽  
有生色低徊展玩豈曰備一時之覽觀亦足壯爲  
善之孤膽已旅暑煩蒸時從師席披讀數條不須

懷冰常有涼氣敬題數語以志嘗往云爾己未夏  
五月門人周宗建謹序



